

四庫全書

集部

欽定四庫全書

空同集卷四十四

明 李夢陽 撰

志銘

封丘僖順王墓志銘

僖順王者封丘溫和王子也溫之父曰康懿王康懿父曰周定王周定父是為太祖高皇帝初溫年四十餘無子憂之時先大夫為王教授王問教授何以能子先大夫對曰仁者必後於是溫戒嚴刻務寬惠削謀計

斷酒省慾已而連生四子僖順其四也獨肖其父父虬髯乃諸兄不虬髯獨僖順虬髯先大夫退而私謂人曰王之傳四鎮國乎吾竒其貌已而長男夭二三以花生廢而僖順果王王諱同銘母梁夫人也以弘治元年閏正月二日生二十三年為王王十四年是為嘉靖三年十二月七日而王薨年三十有七耳計聞今皇帝驚悼遣祭議謚營塋乃嘉靖五年七月十有九日葬汴城南四十里小黃河北實行人邊彥駱奉勅經營之者王

為人英雄有才畧然心恒上人業券僮媵徵聲樂交豪
貴結勢權收置木石將大治宮室未竟而殂初王好夜
宴鐘鼓管籥闐喧徹宵雞鳴月墜香粉銷落烏履雜糅
而其興愈酣或勸焉王弗之從也竟以此殂妃劉氏六
子三女皆嫡出長子先卒次安湜襲其爵次安汀次安
澂次安泖餘未名也銘曰大明建侯同姓者王強支基
布周則蕃昌封丘三傳僖順逾揚御下以嚴賓友用禮
內獲賢助外有任使溫和捐館廩無餘米庫鮮剩錢朱

殿蕪圯僖順承之蹶然而起錦筵寶瑟玉笋珠履享厚
中奪斯也常理三世並庶今嗣則嫡國祚無疆襲繼綿
逝生氣是乘而祉永錫

博平恭裕王墓志銘

博平恭裕王者周惠王第十三子也諱安洩自稱思誠
子又號述古道人母曰蕪夫人以成化十二年正月廿
七日生嘉靖四年六月十六日薨年五十一歲訃于朝
輟鐘鼓一日遣行人楊東祭而營其葬事竣乃復又勅

議謚令書之旌頌焉導之葬盛典也王卒之明年是為
丙戌乃塋王汴城東之邊村其月七月其日十七日也
王長男封鎮國者賢而孝豫窳其父墓塋石堅於是為
封為樹為饗堂喪戚而易禮敬而文君子謂恭裕有後
矣初惠王生男子二十餘汴老曰氣分則漓即其壽德
其索乎會世子暴殂而平樂義寧諸王訐獲罪人益以
德難獨恭裕讀書親友忘勢嗜善修補東書堂集帖校
誠齋錄輯貽後錄養正錄著錦囊詩對諸書教授蕭雅

張鳳等輔之也例初封郡王米二千石及恭裕為王裁如襲封止千石恭裕則勤心治生起宮室置田園備車馬盛賓客饒僮奴褒然為諸王首而臺省之官縉紳之夫湖海之客鮮有不造其門者次第名德必首曰博平博平云王有四男子妃鄧氏兵馬鉞女無出宮人戴氏生長鎮國曰睦柯娶都夫人張氏生次鎮國曰睦橫娶劉夫人又二子未名封而生女子十二長曰金縣縣主儀賓盛時升次曰涇陽縣主儀賓楊汝舟次曰單縣縣

主儀賓王恪次曰上蔡縣主未婚餘者幼銘曰用物精
多爽之神明王七世祖配天作京大邦奠中建侯於周
定憲簡靜懿惠承休宏本茂支積厚發光年嗇德豐厥
後之昌龍旂葆羽駕虬驂鳳馮風御氣英靈輝煌

鎮平府大輔國將軍墓志銘

大輔國將軍者三鎮國將軍之長子而鎮平恭靖王之
孫也諱同鉉周定王系有子同安睦則同者於定王為
曾孫矣初鎮國娶於楊生兩輔國暨廣武遂寧二郡君

而廣武郡君生左宜人左宜人配按察副使李某則大
輔國者於吾妻實母舅而為之甥之夫者義弗得銘辭
矣輔國生天順元年七月廿五日十歲憲宗皇帝賜名
十三封輔國將軍祿八百石長而婚於賈賈封夫人封
夫人二年無何卒初鎮國慈柔罔理於厥家緇人丹士
又日來給破費之以是鎮國雖千石然恒貧及輔國則
自立產鉅萬金起宮房長廊曲榭巍樓置鐘鼓美人凡
宴二八代進更歌遞舞絲竹之音諧比亮瀏泛蕙流桂

迴雪駐日明燈既入樂及徧舞雞鳴月落香粉雜嚙屣
履纔杳如是者四十餘年會累朝明聖四海平晏歲稔
時和正德十六年正月九日輔國卒年六十五矣先是
賈夫人卒勅修北岡之塋輔國以卒之明年月日葬與
夫人合生子一十二人安汭安澈安渺安池安滄安沐
安汀安濡安涿安潰安洳安涑俱封奉國將軍女五人
長平陸縣君配儀賓張輔次隴西縣君配儀賓趙璋三
尚幼孫男十俱幼孫女長襄垣鄉君四尚幼銘曰北岡

之南古河之干崇而乾窾而金棺載棲載安

鄆陵府四輔國將軍墓志銘

四輔國將軍者鄆陵安僖王孫也安僖王四子四曰某
封鎮國將軍而娶王夫人鎮國亦四子四者四輔國云
四輔國十歲以例封祿歲八百石貴矣然純慎不以地
高人而好詩書樂與衣冠徒遊嘗讀前史覽功名之會
輒撫卷慨然而嘆曰嗟誠使某備一官更生普鼎敢多
吾哉又見豪貴人千金飾狗馬衣裘聚名姝罔費惜及

義施顧一錢忍弗能與則又歎曰雙火一膏兩斤獨木是速滅之道耳且貧富命也孰有義而損者邪於是婚喪弗舉者輔國見之輒與醵酒或棺人曰輔國壽揆厥心行永之占也居無何輔國病殂矣年四十一耳於是豪貴人反以輔國為口實相語曰匪火自焚匪斤自樛輔國生成化丙申九月十八日卒正德丙子十一月十九日以戊寅年十二月廿六日葬繁臺之東今上遣官祭勅有司塋焉輔國亦四子某某某某俱封奉國將軍

四子咸好文下人士有父風云女一未封銘曰初帝天
造法屯建侯厥子次五俾王于周實維文昭翰垣中州
定王既殂憲也則立賢而無後簡以弟及是生鄢陵枝
敷葉分由鎮而輔父子將軍於穆輔國年縮操芬賤貨
遠奢欽賢懌文於赫宗藩周也實蕃衆絢驗色羣羽知
騫繁臺東垠修阡櫟粉於中者墳輔國將軍

梁夫人墓志銘

梁夫人者封邱溫和王夫人也父曰梁昇母曰杜氏夫

人生天順八年十一月甲子年十四入王宮有姿才多
能少言王異之禮焉入宮十餘年而生子子十五歲而
溫和王薨薨十餘年於是梁氏子立為王王立乃母梁
氏請皇帝若曰母以子貴封梁氏封邱溫和王夫人是
時夫人年五十矣鳳冠雲帔坐於上於是王暨諸將軍
跪奉觴稱壽退而王妃暨諸將軍夫人進奉觴壽歲時
常而王問寢視膳日惕惕得夫人懽夫人顧乃病於是
王惶懼涕泣選醫慎藥禱神祈祇冀夫人瘳乃夫人病

愈益增久之痰痿失音王涕泣跼問張目頷之而已正
德十二年八月廿二日竟卒受封四年矣今制王夫人
卒皇帝遣官祭而有葬典先是溫和王薨與妃趙氏合
葬洪福岡岡在汴城南四十餘里而梁夫人葬則穿穴
溫和王塚傍而祭與葬皆如制塋之日卒之明年五月
李某曰往予先大夫為教授輔溫和王以是先母高宜
人歲時朝于王宮歸蓋數稱梁夫人云彼予尚童稚然
今猶歷歷記先宜人言梁夫人蓋賢嬪云溫和王隆準

而虬髯軀不甚修然聲吐者鐘焉先大夫嘗私語曰王
必壽溫和五十餘生今王果六十七歲而薨今王娶劉
氏妃生子二女三皆嫡溫和王父曰康懿王康懿王父
曰周定王周定王高皇帝第五子也以是今王年甫壯
而行不卑於它王銘曰有都者嬪淑慎且仁厥美用振
始微終伸以獲于天以育以延蕃錫翩翩賁于邱阡

妃劉氏墓志銘

妃劉氏者鎮平端裕王妃也妃祥符人祖安監察御史

父珣以妃授南城兵馬副指揮初妃以名家聘王王尚
孺成化甲午王十歲矣例當封然父在又庶也於是封
鎮國將軍而明年劉氏封夫人封夫人五年是為成化
庚子夫人始歸于將軍又五年乙巳將軍進封王劉氏
封亦進妃然妃罔乃育顧弗妬育於是盛氏育子某封
鎮國將軍天王夫人育子某今為王何氏育子某封鎮
國將軍張氏育貴池縣主配儀賓陳中云君子曰螽以
和繁樛木詠言瓜摘則稀黃臺是思故寬惠斯賢多嗣

國延女非茲有它善咸後也端裕王薨弘治乙丑薨十
二年為正德丁丑而妃氏卒王之薨也勅墓汴城東紅
船灣矣及是遣官祭妃勅有司開王壙合焉王薨之年
十一月十有六日得年四十一妃卒其年七月廿三日
得年五十六合之日正德戊寅十一月六日也端裕王
父曰榮莊王榮莊王父曰恭靖王恭靖王父曰周定王
往聞諸父老曰定王之蒙化時恭靖王襁褓云間關夷
蠻萬里往旋乃竟名壽顯軒赫繁多賢斯所謂栽者培

之邪今王事母妃謹無殊離于裏其終也哀由喪也茲
宗之巨歟銘曰殊根並蒂齊之義珠沉玉翳雙乃備拓
靈播磨衍所昆承哉絕哉生氣乘

夫人賈氏墓志銘

夫人賈氏者輔國將軍鎔夫人也夫人蓋通許人父曰
賈宏滄州判官母曰王氏判官父恪布政司叅議叅議
父麒封監察御史監察父贊鉛山知縣判官弟定按察
司僉事定弟宗宗人府儀賓賈氏蓋四世甲郡中而夫

人者會又輔國輔國者鎮平恭靖王孫而七鎮國者子也七鎮國女弟又配儀賓宗接姻重戚賈氏貴盛矣而夫人乃顧謙約孝敬沉慧姑田夫人者嚴人也杖人千百不止夫人事之顧事事當姑夫人意懽其心輔國者見夫人事事當姑夫人意也於是悉家事委夫人夫人即又事事當輔國意懽其心於是輔國優游日書史酒食與學士遊及有子女夫人視諸妾子女無殊已子女於是又盡當諸妾意懽其心而夫人子河詩書文雅謙

約孝敬沉慧又盡如夫人故君子謂輔國有子賈氏有甥諺曰胡荈不結瓜菽根不產麻言物必有種也今以賈夫人觀之信哉初夫人童時面盆中嘗見駢幢華蓋之形驚指謂人及長家人夢人送夫人以霞帔而僉事定時知絳州亦夢之故賈氏諸女無如夫人貴者然天固定之矣夫人生成化十六年十二月廿二日以弘治七年十二月歸輔國正德元年奉今皇帝誥封夫人正德十五年正月廿九日卒年四十一歲夫人疾革也猶

力起頰櫛坐子河暨諸子女侍涕泣問夫人弗答也徐而曰吁子侍汝父二十七年矣今幸全而終吾目瞑矣夫吾伯叔姊妹者八也支離而夭折者多矣而吾幸而為夫人有子若孫吾尚有憾邪河聞之愈益慟有聲夫人曰河毋慟也人孰非死者已而曰取我服用珍綺諸物來於是盡散諸子女妾者會輔國亦傍涕泣問夫人曰終事慎而已永久之徒事觀美無益也輔國又問夫人笑而曰君慮閔損單衣邪何問之數也竟無悽色哀

鳴焉將絕曰取命冠服來此國典也吾冠服之見祖宗
於地下君子曰夫死者人之大閑也今觀賈夫人臨絕
而不亂女之君子邪而輔國昨見予則曰夫人蓋名瓊
英云曰咸英者僉事定女也為時知縣妻時知縣死賊
也其妻見賊而後死之夫人聞之曰吁吾姊見賊而後
死乎不如不見賊而死之為愈也李子曰予讀書女傳
見其摭撫賢淑六種是分未嘗不歎婦材之難也今觀
賈夫人生平之懿臨絕之音不為全乎雖然其壽嗇矣

與之角者將去其齒乎輔國與其子河詣李子請曰夫
人以卒之年十二月一日葬城東白塔原願先生銘之
李子曰予往聞夫人而嘗歎婦材之難也銘烏乎辭乃
銘之銘曰坎而封者同邪貞而淑者獨邪沉而輝者珠
邪藏而潤者玉邪吁夫人吁夫人

趙妻溫氏墓志銘

溫氏者子友趙澤妻也正德十年趙君拜開封府儒學
訓導挈其妻暨諸子來越五年是為正德己卯而其妻

溫氏卒自溫之病迄其卒趙君周旋鬱悒踰禮而過情其歛也有鵲立棺首喑喑鳴趙君曰嗟匪妻之靈孰為斯鳴於是仰天大慟頓地哭已而為異鵲之歌曰鵲之來爾毛毳毳亡人孔哀鵲喑喑入我戶歷我筵式裂我肝已又為悼亡詩數百言歌之聞之鮮不泣數行下者或問李子知友者友趙為斯何也李子曰禮緣情踰情以賢過昔者予也居趙同巷焉游同學焉謀同道焉寢嘗同榻焉又嫂呼溫以是知溫之賢稔趙千戶者趙君

之父也守禦安邊營而趙君來游於郡學於是溫事其父母其父若母安焉溫生五男子一女趙君學弗能時歸看諸子溫咸育之俾成人趙君往告予曰微吾妻吾奚免於離憂離憂則中曲亂中曲亂則學弗成及趙訓導也俸薄而屋隘日逐逐熱官送迎歸衙也塵埃滿面目衣振之簌簌土下趙或慚而憂溫笑而慰解之曰君慚學成而官卑邪憂在人下逐逐若邪然命也於是旋旋奔具類器更其土衣或手造嘉飲食勞其

夫日為常於乎若是者足謂之賢不邪賢之則情必過情過則禮必踰禮踰則歌必哀故曰趙之於溫也賢之也非獨妻也溫延安衛指揮之姪女父曰溫某母某氏以成化丁亥十月生卒年五十有三矣其仲子惇奉其櫬西葬安邊營古寺山趙千戶墓次銘曰爾夫弗揚行而有彰矣爾年弗長育而五郎矣爾死異鄉丘首故疆矣

明故申宜人墓志銘

申宜人者河南右叅政董公妻也父曰申潔潔兄申洪
錦衣衛千戶初董娶於李病而無子乃更娶陳氏居無
幾李卒於是繼娶於申而陳氏則大不平開曰吾儒門
女也父兄謂李病無子乃始副室於君然恒日夜念曰
李或不幸卒吾女其繼之矣乃今繼申氏女邪於是宗
族鄉黨聞之私為董憂曰申入門二女必鬭爭董之家其
索乎暨入門申氏孝敬慈婉言動循矩家人有過蓋之不
以彰背而密訓之曰汝過幸官人弗知也知之不撻汝邪久

之家人悅雖陳氏亦悅於是以嫡之禮奉申而申乃又不敢以嫡加之陳恩義若姊妹然於是宗族鄉黨聞之則咸喜相語曰董中書福人也獲斯二賢年餘陳生子瀾申抱之育為己子己又生子潤暨女申又咸抱之育為己子諸子女乃咸亦不自知其非申出或唆之曰汝曹實非申出諸子女不信也已而知之乃顧益母申弗替董之中書也李嘗封孺人矣暨為戶部員外郎李申並進宜人於是宗族鄉黨乃又咸喜曰賢者必福董為叅議

副使四品一十二年弗遷往來齟齬申處之無戚容然
恒語董第清苦自勵暨董陞今官申亦不為動嘉靖元
年董覲挈家北次郎暨其女婚還也申徧探眷屬徘徊
第宅巷陌靡忍去是時厥父年七十餘矣攬衣泣而訣
聞者業頗訝之曰申夫人今年三十九耳何得悽楚如
此暨抵汴痰發遽卒是年十二月廿一日也明日李子
造弔焉二子哭之甚形容摧毀李董通家同進士同寮
然猶不知二子非申出董於是始涕泣道故以墓銘請

李問申生之年董曰申生成化甲辰正月十有一日小名七姐然前李氏生成化己丑亦正月十一日小名亦七姐申卒之明年是為嘉靖癸未瀾扶母之櫬歸五月三日葬邑南葛林務祖塋之次與李氏同云董名銳字抑之玉田人也瀾娶王氏周府左長史春女潤娶方氏少鄉某女適藥暘指揮某長子也銘曰貴匪盡智壽豈無愚修短者天人或昧諸冠冕佩玉豈無非才哲人其萎於聖攸哀是之謂命君子俟之天有流馨永有取

噉蕙霜夙零孤雄鳴悲我銘我傷夜臺或知

明故封太安人裴母張氏墓志銘

乾州裴君為戶部主事時迎其母張氏養於官三年封太安人已而裴君進郎中陞衛輝府知府乃奉其母行抵衛輝居無何母病尋卒君號哭使使再拜稽顙以幣狀走大梁而見北郡李子曰子故寮也又鄉人尚襄我銘事俾有耀於幽李子乃再拜受之曰嘻是余鄉人之母又故寮也厥胡可辭按狀太安人其先醴泉人也徙

為乾州人父曰張忠母曰周氏太安人之歸于裴也逮事其祖父母父母祖父母見其克婦道也喜顧謂其父母曰孫媳婦賢而善事我必興吾家其父母退而私又相慶曰父母謂媳婦賢必興吾家乃後裴公中舉為知縣有美服食太安人對之輒泣曰往祖父母父母謂裴氏必興也今即弗大興也然足以養之乃胥弗逮矣知縣公感其言於是嗚咽相對泣矢曰余決不忝於先人未幾知縣公卒太安人每對裴君語輒又泣曰汝父以

不逮汝曾祖父母暨汝祖父母也恒矢曰余厥不忝於
先人然卒弗大興也所不齎恨以歿者謂有汝也斐君
感其言卒中進士有今官及其拜今封也太安人則輒
又泣曰汝父往雖謂有汝然不及見汝官也言既嗚咽
淚數行下於是裴君益感泣砥礪名行是用有績於官
蓋其封太安人時而知縣公亦贈如其子初官云李子
曰予往來道乾州乾州人謂予曰知縣公蓋故有兄弟
云然胥異居而蚤亡太安人收其孤養之俾各有妻成

家銘曰正統辛酉二月二十六太安人育正德庚午八月十日太安人卒夫諱曰倫字曰秉彝子名曰鄉扶櫬西歸合葬於故山厥宮是安

明故奉訓大夫代州知州邊公合葬志銘

奉訓大夫代州知州邊公既卒之四年是為正德甲戌而其子貢復按察副使提學於河南而奉其母董孺人者來居無何董孺人卒於是邊子仰天大慟絕而蘇曰吁天天乃使母不見貢舉子邪已而曰天天使章上而

弗予過也而母胡死於客所已而邊子果舉一子而憤
母之不及其子見也則益復大慟絕而蘇曰吁天天乃
獨不使母百日延邪乃又靡使貢子舉而及母存於是
抱其子告之母名邊羽云邊子奉其母喪還將合之奉
訓公墓而詣李子再拜請曰於乎微子孰志微子孰銘
於是李子再拜而受之曰於乎微邊氏人其謂予文諛
文曰邊氏者故淮陰人也曰朝用者元末避亂走歷城
而贅歷城王家稱王朝用朝用生王一誠一誠生王文

質文質有二子長曰安次曰寧寧生而異稍長颺言曰我邊氏也呼我邊寧曰大邊氏必我後其官果至應天府治中乃治中罔金畜書也輒倍金獲之久之書萬起萬卷樓謂人曰吾子孫必有以文興者治中生邊節邊節者奉訓公也字時中號介菴子奉訓公生而更異英特即六七歲時見者業識其非常兒云董傑者歷城豪也故善治中及見治中郎異則益敬治中思與婚一日治中大置酒會有董公邊郎立偶傍董公董公抱之起

坐膝上曰呼我舅邊郎應聲曰舅我呼汝甥邊郎應聲
曰甥如是者三董公顧治中大笑滿堂皆笑於是客盡
起觴兩公賀而交其襟割之盟兩公復笑客各復笑醉
乃罷散去奉訓公年二十董公女歸焉生十有七年矣
是為董孺人云董公女歸會治中亡厥金求焉治中母
萬太君者叱止之曰新婦賢不愈獲金乎於是名新婦
金而明年奉訓公為學官子弟為學官子弟人謂必立
取第顧久不第第也乃會試又不第於是可立第者久


不第或竟不第也必曰邊時中邊時中云邊公坎圻者復二十年始有代州之命而州故稱多豪家罔時役公至州則徧召其長老而集之廷語之曰若民也奈何弗役於是布誠申約陳說分義言意懇怛諸長老無不感動泣下者自是無敢弗役公檢獄簿囚夥以問吏吏曰此逋租者爾曰胡不少寬之吏曰脫則挈家亡矣邊公慨然而歎曰吁未孚而責之暴未期而逆其亡茲豈父母之道哉於是與囚期而釋之使歸已而因果如期至

如是者三年代州大治會中官瑾用事天下以賂行公
執古獨不以賂行而忤中謁者已又與御史者拗也坐
是免官歸人有咎公執者聞之董孺人董孺人大驚而
密解邊公曰斯時何時渠謂歸不官若邪於是日治具
佐邊公與鄉人醉游客至則瞿瞿手自辦具然尚惴惴
懼不當邊意而邊亦每加禮於孺人每呼曰孺人孺人
而其子貢則泣涕告我曰孺人事萬太君敬如其夫事
王宜人如事萬太君王宜人者治中妻也茲亦其天性

云貢又曰孺人儉稔不理於綺華往受封也有命服矣
拜封不復服有時貢請服孺人笑曰孺人卑階爾俟汝
大封我則服之此雖其細小然巨者可推矣邊公卒之
年為正德辛未六月乙未距其生景泰庚午四月己卯
得年六十二孺人卒於正德丁丑閏十二月壬申距其
生景泰癸酉正月乙亥得年六十五初治中以子孤也
取王宜人弟之子城子之孺人即弟城猶弟也城有婦
孺人即又娣城婦猶娣也治中歿也城求去城有私畜

孺人知之竟不發亦不以語邊公後孺人病且死會城婦自歷城來匍匐於終事孺人生二男子長貢也始官博士孺人封貢為給事中其父母歷城太常丞其父母在代知荊州府父卒歷城次曰賦天無子一女子曰劉嫁而寡尋亦夭貢取柴氏繼胡氏妾馮氏生羽者賦取趙氏邊子謂李子曰貢以母卒之明年月日合母於奉訓公墓墓在祖墓之次祖墓在歷城東二里地曰蓮渠墓皆枕離而趾坎銘曰謂天無知治中肇之允茲蹈茲

謂天有知代州則屋華隕輝沕懷貞遽畢故材有衆損
苞貴時達碩果之延祺至如掇孺人乃夢垂榴園如生
我所覲歿匪罔愉厥園有楊修阡實良五世爰利二魂
妥是



空同集卷四十四

欽定四庫全書

集部

空同集卷四十五

六

詳校官監察御史_臣龔驂文

中書_臣劉源溥覆勘

總校官進士_臣繆琪

校對官中書_臣袁文邵

謄錄監生_臣蕭日昕

謄錄監生_臣吳銓

欽定四庫全書

空同集卷四十五

明 李夢陽 撰

志銘

明故朝列大夫宗人府儀賓左公遷塋志銘

左公諱夢麟字應瑞年四十弘治三年六月三日病卒
葬白塔兒原梨園中葬二十二年而為正德五年於是
始徙于今墓云今墓去舊墓東北四百步而近李夢陽
曰嗚呼古不修墓乃余今忍銘我外舅焉按左氏永新

逢橋人也語曰逢橋八百左而公曾祖曰左東吳稱堂下派東吳生仁宏仁宏生左輔是為知州公知州公為南道御史正統間嘗有激劾之章謫炎方驛丞會喪其胡夫人乃更娶崔夫人崔夫人以景泰二年五月七日生公炎方驛年數歲知州公起尉氏知縣從舟行墮水流里所出不死天順五年河決大梁鎮平恭靖王如尉氏見公以之歸為其孫廣武郡君後六年誥授公朝列大夫為儀賓云恭靖王周定王第八子於高皇帝為庶

孫而周定憲時儀賓最貴重與封疆官分席而抗禮道
逢則以鞭相揖及公為儀賓乃諸儀賓者業稍稍降矣
公出獨張蓋駿馬見諸所官悉如前定憲時諸所官不
平也久之乃顧獨敬重公以公才行故然公固美貌奇
偉作詩善畫今祿給不以時王孫貧者出或不能具驢
車矧如儀賓矧如我外舅行嗟嗟悲乎悲乎郡君父曰
四鎮國將軍溺佛燒丹四方諸以佛燒丹來率輒騙其
金資居無何將軍貧積負以萬數無能償而衆債家輒

又曰謹其門將軍泣欲尋死會公謁將軍出因佯呼曰將軍死矣衆愕然欲散走公乃止之謂曰若等自度將軍力能盡償汝乎且汝等必迫之使死乃已邪衆業懼無敢言者公曰假如人償其半能以全券見還乎衆皆喜諾謝曰願矣於是公乃自往貸諸豪富家緡諸豪富故雅重公乃無不願與緡如其半數公又輒陰易絲絮布帛銅錫等昂其直與債家因又勒其半三之一而即以其一轉生息償前諸豪富家歲餘諸所負者皆平矣

公病革强起坐會氣絕將軍曰嗟我固謂吾兒為佛也
力主坐塋於是公有四子長曰國璿年十三歲次曰國
璣年十一歲次曰國玉次曰國衡年各四歲以卑稚蓋
咸莫克成我公塋事公卒十四年而國璿卒塋之又八
年國玉卒將塋國璣號哭向母郡君叩頭請曰夫塋者
所以妥體魄而棲靈神也乃吾父忍營營逮茲郡君哭
曰嗟女夫謂何於是李夢陽趨而進相向哭對曰禮也
乃於是謀徙于今墓塋用北首焉然公肌體完也髮鬚

不脫落故衣衾弗朽也是時郡君髮髣髴皤皤矣率其二子四婦孫四男二女暨厥壻厥女暨外孫環之哭嗚呼公詎知二十年後如此哉父老曰往水退有人爭田邊我田公乃置酒召爭者謂曰第捐其餘與我乃其人慙罷爭亦不侵於我田即今塋地云蓋左氏三世異墓曰仁宏者永新神公壇墓其彭夫人襄陽墓知州公永新左方墓胡夫人炎方驛墓崔夫人尉氏墓惟公墓今并葬其二子銘曰下不墊黃泉上不見白日改而安之公

以室

左舜欽墓志銘

左舜欽者我外舅第三子也名國玉字舜欽母曰廣武
郡君以成化二十三年九月七日生舜欽會孝宗皇帝
改元詔下故其小名曰宏保兒云生四歲喪我外舅十
八娶鄭氏女鄭氏女母曰遂寧郡君廣武郡君同母弟
也舜欽遂連生二子年二十四以病卒李子曰嗟哉天
乎舜欽竟以此死邪仁者不壽乃余則何言矣前余懼

首禍黜還尋被鉤織械繫北行厥勢雷轟山崩人人自保竄匿若將及之舜欽獨力疾從酷暑無晝夜行飢渴蓋是時瑾威權熾矣顧頗獨禮修撰康海敬之於是舜欽為書上康子累數十百言其大要有四言瑾持天下衡必不以私怨殺人一又為天下惜才必不忍殺李子二又康子必匡瑾以古大臣之業三又康李義交也即為之死諍不為過四康子為飲容謝焉既歸疾愈益甚於是治居于東野墟中茅屋土垣學辟穀道引之術蓋

逾年竟卒以正德五年六月十三日從父塋於新墓銘
曰奕奕大左肇自逢橋八百雲布英森秀翹爰有東吳
實生仁宏再世不仕子孫以興桓桓爾祖拜之司直秉
志不易中路鍛翮於惟我舅先訓是敦光光巨藩來儀
作賓郡君作配顯王維孫高祖太祖厥封廣武惟茲郡
君淑貞奉姑誕育三雛玉也挺如嗚呼弟玉孰使女挺
孰奪其永急難在心我淚如縷銘於堅石子目其瞑

儀賓左公合塋志銘

正德十六年三月廿九日我廣武郡君卒既殯其子舉人國璣筮地焉遇同人上九同人于郊无悔又筮方遇坤西南得朋於是偕術人出大梁西南行七十里至其祖母崔塋西獲地焉先是弘治二年六月三日儀賓左公卒於白塔兒梨園中塋矣以弗吉遷之園東四百步而公長子國璿死塋從之三子國玉死又從之四子國衡又從之衡母郭氏死又從之至是國璣盡發其諸櫬奉之西郡君葬既與公合而諸等墓各如禮從其日為

嘉靖元年二月七日其地尉氏康牆保坳也郡君父曰
三鎮國將軍將軍父曰鎮平恭靖王恭靖王父曰周定
王周定王父是為太祖高皇帝將軍娶楊夫人以景泰
二年四月十九日生郡君生十六年而婚於左左公諱
夢麟字應瑞永新逢橋人也父曰左輔監察御史謫炎
方驛丞而繼娶于崔景泰二年五月七日生我公炎方
已而承擢尉氏知縣携公尉氏會恭靖王避水如尉氏
見公遂以之婚郡君為郡君儀賓授朝列大夫籍宗人

府云公修軀偉姿讀書善繪喜吟喜與豪人游是時家
貲鉅萬起第宅闢園田出則駿馬聳蓋僕從都入則引
醇飫肥鳴琴揮管灑然竟日崔之俎也公廬諸墓無何
疾舁歸卒矣年四十耳郡君雖貴人然天性慎惠持禮
奉姑暨夫無殊于家人喚姑崔面背咸姑及庶姑邵面
背又咸姑而夫之俎也屏澤飾卸華綺蔬素終身怒不
至詈笑不見斷終其身弗踰閭見人也然早夭其三子
過痛痿痺瀝瀝涎已又亡其女暨邵氏姑又折其冢婦

竟以憂卒年七十一矣是時孫男子左驂始有婦左駟
左騶左駟左騏俱孺孫女初歸于李昆女夫李夢陽曰
於乎賢罔壽壽罔愉老罔偕三者天下之至哀也矧又
隕厥雛公之殂又火厥室廬郡君雖貴人然孀居憂驚
茹荼至矣故君子謂天道無知使賢者弗殺銘曰田有
弗獲黃矢閱之種有弗苑壅之灌之德有弗食守一俟
時嗟我公同茲永茲宅茲聚茲陽發陰茲驅神役祗由
本達支以乘厥生以融厥明以祥以靈以觀厥成

封宜人亡妻左氏墓志銘

左氏者李夢陽妻也左氏蓋廬陵人曰仁宏者生泰州知州輔輔生宗人府儀賓夢麟而儀賓婚廣武郡君成化乙未十月巳丑生左氏於汴邸郡君者鎮平恭靖王孫王周定王第八子也左氏生十六年歸李氏李氏者陝以西人也李子父曰奉直君奉直君為封邱溫和王教授居汴而挈其子夢陽來初李子約婚約成不之婚也曰教授微而貧及約左氏儀賓則顧獨喜入白其母

并郡君氏母郡君乃亦咸不之婚也曰夫非李教授兒
邪微而貧儀賓曰李氏子才竟婚李氏是時李子生十
有九年矣明年為弘治辛亥左氏生子枝云踰年壬子
李子舉陝西鄉試第一癸丑登進士第左氏從李子京
師會姑舅連喪李子西於是從而西戊午李子拜戶部
主事居京師左氏復從京師已從通州己未孝宗皇帝
上聖慈仁壽太皇太后尊號封左氏安人給勅命壬戌
李子權舟河西務左氏從河西務明年李子餉軍西夏

挈左氏還過汴是時儀賓母儀賓亡矣獨郡君而左氏
翟冠翠翹揚帔曳裾見焉其行于于也暫而頽瑱而流
珠郡君喜已而泣顧謂侍人曰向謂李生微而貧乃今
若此矣因道儀賓語云云愈益泣而慟乙丑李子進戶
部員外郎會今皇帝上兩宮尊號左氏進封宜人給誥
命兩命咸美辭云明年丙寅為正德元年李子進郎中
是年冬尚書洪洞韓公率百官彈宦官劉瑾等瑾以彈
事出李手明年正月薦逐李子奪其官於是左氏從李

子還而潛大梁墟中已巳左氏兒有婦矣庚午瑾誅明年李子起江西按察司副使提學是年左氏有孫壬申李子迎左氏於江西左氏舟河行值樁舟破僅免入江過馬當帆脚打僮人落江沒及湖口風逆困崖下洄渦中舟突崖石時時響於是左氏怖欲死計繫之登石免甲戌李子以與江御史構徙理官於上饒而徙左氏星子會訛言賊過星子於是左氏自徙於潯陽是年李子官復罷道潯陽就左氏泝江入漢至於襄陽將居焉會

秋積雨大水堤幾潰左氏曰子不心大梁非患水邪夫
襄汴奚殊矣且蘇門箕賴之間可盡謂非邱壑地哉李
子悟於是挈左氏歸歸而左氏病踰年骨立死死之日
正德丙子五月丁未年四十二矣翌日牲奠左氏烹牲
腸腸自團織文理陰陽狀若流蘇垂綏夾耳提襟在上
李子觀之哭愈慟曰嗚呼神哉於是賦結腸之篇李子
哭語人曰妻亡而予然後知吾妻也人曰何也李子曰
往予學若官不問家事今事不問不舉矣留賓酒食稱

賓至今不至矣即至弗稱矣往予不見器處用之具今
器棄擲弗收矣然又善碎損往醯醬鹽豉弗乏也今不
繼舊矣雞鴨羊豕時食今食弗時瘦矣妻在內無嘻嘻
門予出即夜弗扃也門今扃內嘻嘻矣予往不識衣垢
今不命之澣不澣矣縫剪描刺妻不假手不襲巧咸足
師今無足師者矣然又假手人往予有古今之愾難友
言而言之妻今入而無與言者故曰妻亡而予然後知
吾妻也李子買大陽之山嘉靖某年月日塋左氏山下

杉棺柏槨負坎抱離四山三水是山也鈞州北三十里
里曰東張南稱杷裏右嵩前賴左連具茨李子曰嗚呼
匪志曷彰匪銘曷藏志防虞銘永處矧吾妻矧又吾知
吾妻於是志之而復銘之而刻之石銘曰坎而宮汝藏
汝封亦既考終汝曰咈約而修伸妍而短屈惟屈與伸
由人匪人繹而思之我心如焚廼竟汝分生雖汝分歿
汝共墳萬祀千秋孰短孰脩汝樂斯邱

處士松山先生墓志銘

大明正德四年六月四日處士松山先生卒年七十有六歲先是處士便數諸飲食不可口顧惟啜白酒又足時時腫無力謂余曰歲在蛇矣吾其死乎死則子銘其墓余止之曰胡言之遽邪然竟死也悲夫處士有甥曰王泊賢而文實主乃塋事來速銘而處士弟珮會又以其遺事來赴因并掇拾為志志曰處士姓丘氏名琥字伯玉號松山蘭陽人也父陵官至山西左右政使娶谷氏夫人生四子處士長也幼穎異於書無所不讀然刻

苦因而吐血服白朮丸數十升愈已又時病目廼棄去以商遊吳中盡發其蘊為詩由是知名吳中嘗過丹陽買舟行一人來附舟直入寢所處士心知其盜也佯落簪舟底而盡出其衣篋鋪設求之又自解其衣以示無物又俾僮與酌酒夜則自撫其臥側明日其人去未幾殺人于丹陽城中被縛乃以其事語人曰吾幾誤殺邱公人服其智經營四十餘年遂起家至千金顧盡散諸弟男女及族若所識貧乏者已而金輒復集集而復散

終不為自計嘗起第大梁東門結亭蒔木芙蓉菊亭旁
更為詩先後所為詩積萬餘數造詞巉削棘澁大類黃
韓亦為金元曲而比事假托謔浪不恭大抵玩世而泄
所不平酒中竦身按歌其音亮重越裂出宮雜商若敲
金戛石歌竟引滿掀髯而笑人莫之測也居常布衣簷
帽非名士而罕與往來蓋終其身足跡不至公府云謂
人曰我死稱為松山處士足矣竟以此卒先娶劉氏生
子忠上洛王教授先卒繼朱氏生女適生員薛翬側室

潘氏生子鏞常自憤其末年家事不遂臨終曰我死薄
歛不用槨棺首第書曰丘松山不瞑目之柩又曰死即
反葬母殯鏞奉治命以卒之六日而反於蘭陽之屯與
劉氏合忠有五子四女銘曰丘氏之先肇自東明曰丘
彥德始遷蘭陽傳之仲和實生士能士能生陵處士三
季璐珣及珙璐至叅政珙為縣令珣才亦處處士捐館
二季先喪惟珣緋挽於乎處士遠蹈跨時危行德孤敦
實歛華獨行不疑人皆劫劫我約而腴季承以官承志

者吾歸于玄所從父母祖

聽亭先生墓志銘

先生姓徐氏郢城人也名聰字聞博嘗亭聽上於是稱
聽亭先生先生力行篤學苦節清修以廉孝聞春母病
思櫻非時無從得先生泣禱行彷徨叢薄間遇櫻歸母
食之愈人大異之稱徐孝子夫冬林之笋冰溪之魚固
非時者也精誠之至氣變以之故巢幕之雀避舍之蚊
君子不謂之怪也斯亦足以知天矣今例第不以孝文

則第孝子乃為諸生攻文文又弗第也乃以貢為醴泉
縣學訓導云李子之西也嘗往來奉天之墟是時訓導
罷矣乃土人猶往往能道訓導行事李子聞之則慨然
而歎曰吾不試故藝向使渠非小試之安知不目其為
兀兀之腐夫訓導之訓其徒也先行而後文制外以兼
內講肄以端其習考覈以程其規標的以大其業宏博
以邃其思抑揚以厲其志夏楚以鼓其氣久之士憮然
若失也勃而變已翕而從翻然而革訓導乃忻忻喜曰

吾志其行矣於是構齋植竹莪冠委裾講唐虞周孔之緒而乾州學會官缺檄訓導往攝之久之而乾之徒猶其徒也於是人始知訓導敬重之謂之才醴泉飢錢叅政者出帑金千檄訓導賑之或問錢奚捨縣而任學也錢曰人也孝廉孝則不忍人廉則不愛金飢婦有剥齒食者縣捕之將磔之市訓導見之則泣曰不能使之不飢而能使之不齒乎非情也夫剥齒救斃耳而今磔之是以斃易斃也令釋之人聞之愈敬重訓導謂其才乃

使攝其縣事縣以之治於是豪人懼歸我侵田于學志
行矣無何免去或咎之訓導直晒曰子謂我兀兀腐夫
邪其亭滙上也年向衰矣猶聚徒說先王顧益篤即大
寒暑罔輟也晚病目省延接矣至遇經生學子則顧繼
繼竟曰李子曰予之南也嘗度滙矣於是又獲知滙亭
先生云而滙上人蓋至今稱儉鯁直篤行耽學必首先
生先生生宣德乙卯三月廿七日卒正德辛巳九月一
日年八十七歲娶陳氏義士陳某女先卒繼甘氏壽官

甘鍾女年五十三歲亦先卒甘生徐固舉人女聘舉人
趙應式卒側室趙氏生徐確女適袁曷卒徐生曰於乎
吾父幸有聞抑孰知吾母者母貞懿寡言起家勤矣追
遠近矣逮下惠矣途路瘁矣然弗壽弗貴矣抑孰知母
者按徐氏諱保國初始徙郢城城西三里許其世墓也
以正德年月日塋滙亭先生於墓而二配合銘曰梗楠
在山匠氏之恥和璞終韞玉人其鄙囊穎攸脫乃斂乃
歸剝耀刮垢鉤噴探微約之身挾之文以嘏其嗣人先

民哉

高處士合葬志銘

高處士者大梁人也名瑾字彥節年六十八歲正德四年二月五日而卒塋鄭門塋矣後十有二年為正德辛巳而其配侯氏亦卒以明年正月廿七日啓處士窆合焉侯氏少其夫二歲卒之年七十八矣生二男子長曰珣東明縣丞擢知縣又知東光次曰璐從弟提殺之二女子一歸周鏞驛丞一歸陸澍典膳珣生三男子長

曰爵次曰仲嗣縣學生次曰叔嗣舉人璐一男子曰愛
李子曰孔子有言善人吾不得而見之矣得見有恒者
斯可矣予誦其言未嘗不酸心流涕也蓋重傷時俗之
偷云夫感質成真溺華忘實礦金璞玉非其人莫識也
乃人見藝材辯博豪縱赫霍輒歛驚慕效稱賢或莪冠
飛纓氣使威喝則又嗟羨敬事之遂令閭閻山野恂朴
自修力田飭行之夫閭沔無聞不見禮於輩流吁時之
偷亦甚矣乃余今幸知高處士處士固閭沔人也夷考

其行則孝弟儉直者也少事母歲時上壽自歌舞為懽
事其二兄旦趨侍上食而退出則為執鞭或道傍伺顏
色蓋猶事父云長而喜誦書史說先王然不務裘馬不
喜酒不畜媵婢嘗歲暮出取負欠割券持一空車歸里
人望見盡笑之處士不較也珣丞東明也強逆處士官
邸蹙額曰吾自不入公府今公府居邪會舊令代之去
問處士曰我孰與新令賢處士默然熟視之已而曰君
似弗如也令歎服其直人又言處士家居里巷子弟見

之為起拜肅立僮僕假借不復闕白其主人雞豚放猶
一家斯益足為淳風矣侯氏者嚴之女也事姑猶夫事
母事二嫂猶夫事二兄嫂之子提殺璐也侯與處士計
曰吾幸尚有珣奈何令伯氏無後卒出之獄以百金詣
處士謝處士不受詣侯謝侯亦不受曰吾利而金出汝
邪君子謂夫婦者足為媿德駢美者矣而顧咸闇沕閭
閻弗彰吁足傷已足傷已珣之知東光也亦強逆侯侯
弗往曰汝父不怙公府吾獨能跋涉就汝邪人言侯即

老親戚子弟罕得見其面禮婦人問答不踰閭出則擁蔽其面殆斯之類也夫叔嗣曰吾先洧上人也高皇帝定天下也立幟以定民曰赤幟軍白幟民曰義者傳白幟遂徙大梁從民義生一子九九生一子清清娶季氏生二子聰讓處士銘曰墨不能朱石不能糜松柏冬榮厥操詎移居約履難驗秉觀願我躋彼蹶彼昭我晦匪財而富匪爵而貴蹈貞服朴是曰民良高恰布衣孝弟直方閭里起敬閨人贊襄臧獲循循子孫赫昌今之梁

孟考世莫識不有曰季孰知冀缺不有景升孰欽龐德
我言匪蕪徵此銘石

劉處士墓志銘

劉處士者泰和人也名熙字和皞號敬止於是稱敬止
先生先生歿二十年是為嘉靖元年而其子潜始以中
江教諭文衡於河南李子之提江西學也嘗識潜諸生
中異之而首拔之於是潜見李子而泣而求銘其父墓
曰於乎潜死罪死罪父歿二十年矣而墓無銘也潜誠

死罪死罪雖然有待也非敢後也李子曰往吾按泰和也嘗聞若父矣矧潛也遊吾門序曰劉氏者其先金陵人也後徙泰和之珠林已又徙荷山號荷山劉氏諱公唯者潛曾大父也號醉德醉德生元鎖號訥軒訥軒生處士即敬止也處士少孤不仕然讀易精詣授之弟弟官新會簿授之子子以之第授之徒徒多為名流處士故善酒母嘗病革處士籲天求身代獲愈於是絕口不酒亦不復肉如是者幾十年周旋膝下母竟以壽終母

之終也處士苦塊棺側以俟其弟來凡年餘無渝無情
蓋其性方剛得諸天者如此而族屬有犯或弗悛者必
鳴以攻之諸生弗率者斥去不少貸以是人服其誼而
憚其嚴云處士生某年月日年六十有七歲配蕭氏石
岡大家子與處士齒德相高先八年卒生子一潛也女
一適某潛配歐陽氏生子二女一云李子曰予讀泰之
九三而知天人之交也劉氏其當之矣夫劉氏於趙宋
顯矣科第甲一邑是後寢遠而寢微非謂無平不陂無

往不復者歟夫醉德而下三世約矣然能歛華而敦實
守一履朴堅德固性迄於潛也文行卓如後將有大聞
於時非謂艱貞无咎勿恤其孚于食有福者歟夫天人
判者爾往來進退譬猶符券至數百年而猶合於劉氏
見之故曰予於泰九三而知天人之交也銘曰耕也或
饒蔣也或萎惟德之綿其悠如泉流之為川渟之為淵
流之匪爵渟之匪約君子有穀後食其福

梅山先生墓志銘

嘉靖元年九月十五日梅山先生卒於汴邸李子聞之繞楹彷徨行曰前予造梅山猶見之謂病愈且起今死邪昨之暮其族子演倉皇來泣言買棺事予猶疑之乃今死邪於是趣駕往弔焉門有懸紙總帷在堂演也擗踊號於棺側李子返也食弗甘寢弗安也數日焉時自念曰梅山梅山梅山姓鮑氏名弼字以忠歙縣人也年二十餘與其兄鮑雄氏商于汴李子識焉商二十年餘矣無何數年不來李子問演鮑七奚不來也演曰父母

兄三喪曰喪舉矣奚不來也曰七叔父四十四歲始有子而姪也一耳以是大係乎身家已又問鮑七何為演曰理生飭行訓幼睦族玩編修藝課田省植八者焉已其久也內孚而外化之是故鄉人質平剖疑決謀焉益者必之焉故效良則芳標美規懿者必曰鮑梅山鮑梅山云正德十六年秋梅山子來李子見其體腴厚喜握其手曰梅山肥邪梅山笑曰吾能醫曰更奚能曰能形家者流曰更奚能曰能詩李子乃大詫喜拳其背曰汝

吳下阿蒙邪別數年而能詩能醫能形家者流李子有
貴客邀梅山客故豪酒梅山亦豪酒深觴細杯窮日落
月梅山醉每據牀放歌厥聲悠揚而激烈已大笑觴客
客亦大笑和歌醉歡李子則又拳其背曰久別汝汝能
酒又善歌邪客初輕梅山於是則大噐重之相結內明
日造梅山邸款焉汴人有貴客欲其懽於是多邀梅山
梅山遂坐豪酒病損脾今年夏患瘡李子往候之梅山
起牀坐曰弼瘡幸愈第痰多耳然業處分諸件令演辦

酒食俟其起觴客別而還歛也先是梅山作憶子詩曰
吾兒屈指一載別他鄉回首長相思在抱兩週知數日
携行三歲隨歌詩筵前與誰論賓主膝上為我開鬚眉
情偏憶汝老更苦中夜難禁迴夢時李子因說曰君病
無苦念家梅山曰諾諾不數日而君蓋棺矣嗟梅山梅
山梅山又嘗作燈花詩秋燈何太喜一焰發三葩擬報
明朝信應先此夜花重重輝絳玉朵朵艷丹霞愛爾真
忘寐聞蛩忽憶家李子曰君詩佳頓如此梅山曰吾往

與孫太白觴於吳門江上酣歌弄月冥心頓會孫時有
綿疾吾醫之立愈諺曰盧醫不自醫誠自醫之黃岐鵲
佗至今存可也嗟梅山梅山叔牙後也其居歛也
號棠樾鮑氏趙宋時有遇賊而父子爭死者於是所居
里號慈孝里云梅山父鮑珍也珍父文芳文芳父思齊
珍號清逸高尚人也娶王氏生二子次者梅山梅山娶
江氏生一男子二女子男曰若渭今六歲矣梅山生成
化甲午某月日距今嘉靖壬午得年四十九而其櫬還

也演實匍匐苦心以之還厥情猶子也以某年月日塋
某山之兆銘曰崎嶇巖人謂非險淵洄瀕洞猶謂之
淺坦彼周行彼復而迷桃李何言下自成蹊嗟鮑子胡
不汝悲胡不汝思

空同集卷四十五

欽定四庫全書

空同集卷四十六

明 李夢陽 撰

志銘

寄傲先生墓志銘

先生名玉字廷瑞姓韓氏通許縣人也初先生舉於鄉
拜郟城知縣郟邑小而賦繁民弗堪也以是因先生憐
焉而例體邑政無巨細必闢白於所司令始行或見弗
之合即美格閣以是民愈困先生於是則竊歎曰若是

奚令為也凡其細則輒自標號行不盡闕白所司於是
所司怒督責之而先生則又抗言執理往往無尊巽色
於是所司謂先生傲轉相擠陵斥先生乃棄官歸稱寄
傲子而通許俗人士大都宴會酒懽為適罷官則更放
騁而出其官時所營製如冠袍裘馬器皿華綺諸等盡
銜耀鄉人曰不如是猶夜行也而先生歸則獨嗜古書
奇字性又不酒第閉門坐課兒孫曹於是大為鄉人所
不悅目為韓怪而先生稔患目又寡言笑對客長揖寒

暄而已第瞑目坐於是人益遠先生先生弗動也今俗
喪即人士家崇豪華文具先生父母喪也則惟據典實
廬之墓兩喪者六年以斯觀之其平生足推矣大梁人
李知縣者先生姊夫也每招之來會其長子禹卿從空
同子游又其孫鼐為儀賓而其同邑李知府亦罷郡居
大梁正德末先生乃徙大梁居焉是時道州何公以都
御史巡撫河南聞先生有數學敦禮之叩焉先生辭謝
卒不傳嘉靖二年七月空同子會先生於酒筵見其篇

文富贍而嶄巖驚曰寄傲今七十歲矣乃為此大文邪
時李知府亦在坐曰寄傲尚作蠅頭楷字與人札即片
紙吾未見一畫苟也空同子喜曰壽徵壽徵居無何儀
賓鼓喪其配君禹卿喪其妻而先生亦不起矣於乎於
乎是年八月十八日也按韓氏其先項人也諱諒者始
遷通許而先生父諱敷嘗為臨淮知縣東城兵馬指揮
娶劉氏以景泰某年三月廿八日生先生先生配苗氏
有子五人女一人壻曰賈希朱孫男女某某卒後兩月

禹卿奉其柩返葬通許之塋并其二喪舉云銘曰胡為
而官三歲而掛汝冠胡為而遷與其二喪同旋於乎孰
畀子以賢孰躋之使顛孰嗇之使寒悠悠乎蒼天

明故王文顯墓志銘

王文顯者蒲商也名現字文顯號噫菴子初文顯為士
不成乃出為商嘗西至洮隴踰張掖燉煌窮玉塞歷金
城已轉而入巴蜀沿長江下吳越已又涉汾晉踐涇原
邁九河翱翔長蘆之域竟客死鄭家口先是王教諭有

五男而文顯長父官既卑貧又四弟望我立以是文顯
乃棄士而就商商四十餘年百貨心厯足跡且半天下
然卒老於鹽場文顯之為商也善心計識重輕能時低
昂以故饒裕與人交信義秋霜能折利於毫毛故人樂
助其資斧又善審勢伸縮故終其身弗陷於穽羅文顯
既以商起家乃大室廬備賓祭畢婚嫁四弟各成立王
氏固奕奕彰矣而教諭君罷歸顧獨出分其長子文顯
則第涕泣自咎責罔攸辯乃效作五噫之歌歌曰仰彼

昊天兮白雲霽霽噫莫慰父心兮子之罪噫朝入埽除
兮出而暮思噫清風飄裳兮明月鑒之噫古有履霜兮
實獲我志噫歌畢遂號噫菴子教諭君聞之悔泣父子
如初弟珂者之舉於鄉也會文顯省親歸稱觴遞壽其
父顧之喜曰兄商而利弟士而名乃吾今何憾矣文顯
嘗讀史以孔明取劉璋為是又謂宋黨禍成於蘇公非
程子激之也間質於其父父則又大驚喜曰現也汝商
而士邪乃吾今何憾矣吳龍者僮也嘗竊於文顯文顯

寬之一日外盜求文顯急執龍刃脅之龍卒不言文顯
匿所其父聞之則又大驚喜曰現也利而義者邪然天
固鑒之邪文顯嘗訓諸子曰夫商與士異術而同心故
善商者處財貨之場而修高明之行是故雖利而不汙
善士者引先王之經而絕貨利之徑是故必名而有成
故利以義制名以清修各守其業天之鑒也如此則子
孫必昌身安而家肥矣按衛推官張君狀王氏榮河人
也諱仲文者元末徙蒲耕於蒲南十里今稱王家莊是

也仲文生彥純彥純生景嚴景嚴生秉信秉信生王榮
賓鄉飲以壽官榮生馨教諭者也教諭娶張氏以成化
五年九月十日生文顯嘉靖二年五月九日卒年五十
五歲娶潘氏生崇仁崇先崇道州學生也女二長適監
生李廷光次聘蔣澄孫男二人女三人文顯既卒之明
年二月某日葬東原之塋銘曰珠不珍貢而輝汝淵鶴
不翼天而唳汝田我得匪苟我室則盈我有不有我利
則成義不入於穴仁而免於盜兵逾艾而殞於旅茲天

邪人邪數邪

明故李大法合葬志銘

李大法者予門人李瑛之父也名倫字大法祥符人也而居之杞大法父曰李洪洪父祿祿父讓初洪武辛巳河灌大梁於是讓挈家走杞水平或勸之歸讓曰梁杞百里耳何必歸後辛巳河又灌大梁讓子孫遂免于走明年壬午九月二十日大法生于杞正德十六年歲又辛巳人詢詢謂河且復來是時瑛以學諸生寓梁或勸

大法胡不俾而郎回杞大法笑曰天地數若是齊邪已而河卒不來大法娶于崔瑛母也崔生天順癸未三月八日後癸未是為嘉靖二年三月三日而崔氏卒大法素雄飲忼慨無憂少貧嘗為親負米力販魚鹽然處之灑如也及崔卒則顧鬱鬱有戚容於是瑛跽問曰父何憂也大法於是仰天長吁良久曰嗟吾將去汝曹是以憂也瑛曰兒聞之陰德陽報父鯁直無私曲惠流於窮人孝弟忠厚鄉閭信之斯必壽大法曰嗟汝諸生也不

知天道邪天數周則易世之人逃焉者寡矣汝母不癸
未生癸未死邪明年甲申二月二十一日大法果卒於
是君子謂大法知天順命李瑛問其師曰仁者有不壽
乎曰有之仁而壽者理也或不者其數也仁而謂必壽
則堯舜周孔雖至今存可也於是瑛吞聲哭曰父未嘗
學而知天順命已而曰吾母之奉姑也姑矐母籲天願
以身代者六年而姑目復開其事夫也罔不敬也然罔
不勤也如是而弗之壽亦數否邪李子曰嗟瑛脩短非

所論人顏跖是也自教之衰也孝弟忠信之士不表於鄉閭於是田野篤行率閭焉無聞如大法者夫婦純懿設非其子瑛以文學與縉紳遊即美誰其知者於乎斯足以觀世矣大法子二長琨娶屈氏次者瑛也娶馬氏女二一適杞生王用中一適溫舉孫男五人女三人以卒之年月日葬杞東郭堤外祖塋與崔合銘曰人也最爾行則蹶爾杞東門原有穴遂爾配與之同亦云遂爾千秋萬歲佳城蒼蒼

賈道成墓志銘

賈道成者通許縣人也父曰賈定山西按察司僉事母曰劉宜人以成化甲午四月二十日生道成生踰年而其母亡又二十二年其父亡賈生乃奮厲自立力學曰始吾名也父名我曰希朱及字也字我道成斯非望我為紫陽徒邪於是志洛閩之紹而深之以造乃賈生顧又專易嘗俯仰高下旁觀流形而問李子曰月盈虧者何也李子曰日映之也光之虧也去日遐抑又聞月九

也視側則光虧賈生曰九之譬謬也夫既日映之也彼
生之哉也懸如弓或又瓦仰何也又嘗問李子聖人觀
象而繫辭也三極獨不言象何也李子曰道包象邪動
者道邪賈生不答賈生游郡學廩矣竟弗錄於有司人
於是頗咎賈生曰文奚不時也或曰賈生韜默或曰枯
而神短賈生聞之亦不答乃顧嗜吟正德戊寅九日李
子賈生共汎城隅之陂賈生詩曰波水澄霽澹澹浩浩
樓臺感沓林石晶窈窕霜露載零徑蘭凋槁偉彼松筠哀

此衆草人生幾何榮名是寶辭調高逸李子未之和也
第扣舷歌蒹葭之章應焉已而賈生還邑則又作詩曰
郊原曠以脩零霜一何淒飢鴉噪枯桑故城委蒿藜黃
鵠輕四海游子乃念歸懷瞻顧里閭怛焉傷路岐意若
自傷靡遇者人於是頗復狹賈生疑之踰年而賈生病
死矣正德己卯五月二日也年四十六矣賈生即病顧
猶不輟吟病間目其弟希尚曰吾作一詩自弔誦畢瞑
希尚及從羣弟侍聞之皆泣賈生復瞪目曰斯何傷古

誰不死遂長瞑生嘗自謂漂泉子凡所述稱漂泉子云
亦其不食讎歟初生喪弟喪妹喪繼母妻喪兄已復喪
妻妻知縣韓玉女也無男女遂絕希尚奉兄柩以卒之
年十月十日葬之父墓之側李子曰予嘗志其父墓矣
是故於賈生不復及其家世銘曰家將興賢者先生家
將殃才者先亡其生也登其亡也崩夫賈氏者顯也積
五世矣及其季也纍然衰絰之繼也弔者出而唁者至
矣嗚呼道成胡亡胡生吾女銘乎

明故何君合葬志銘

何儀賓文昱者我從孫外舅也一日李子酒會要何不來問何何不來也曰奔母喪耳李子瞿然驚曰乃予罔聞其母疾曰其母足背丁白而栗母弗謂其丁也爪破之已又難而行丁乃走內攻母竟死後數日何儀賓來我泣而丐銘問之果然又問奚兆何曰吾父歿廿年餘矣母丁之前夜夢父馬而過叱母曰速從我來按何氏其先河間人也後徙汴耕朱仙鎮西曰全者壽官也生

二子長曰何君諱禮字大用娶陳氏先卒再娶慕氏生四子長儀賓也配沁源郡君次文昇次文晨次文星縣學生二女一適劉鷺一為鎮國將軍夫人初從孫議婚也人皆曰何儀賓賢問何賢曰貴而禮問其父人又皆曰何君賢問何賢曰富而義既婚也李子之嫂會慕氏歸而又稱慕氏賢問何賢曰默而和李子曰立莫大於禮利莫先於義默莫要於和夫何氏者三善備矣烏得而不興何君生正統五年十二月九日卒弘治十四年

二月一日得年五十五歲陳氏生正統九年十月十日
卒成化十七年七月廿八日得年三十一歲慕氏生天
順八年七月九日卒嘉靖元年十一月十五日得年五
十九歲合葬西韓村之墓銘曰天之道還兮地之義完
兮還視爾履完視爾美美哉爾阡穿不及泉吉而安兮
明故蔡思賢墓志銘

蔡思賢者夷門之隱人也名鑑字思賢號淨居道人初
蔡之冠也筮賓敦典議字焉蔡長揖謂賓曰字我曰思

賢賓問何也曰竊聞之鑑以鑑貌人以鑑心非賢不可
吾其思之矣其長也勤敏以周物恭儉以裁用和易以
混俗廣施以闡仁擯惡以充義敦詩書以訓來陳古今
以驗往其久也質往者服濡訓者革耻擯者避德施者
親於俗無睽在用靡匱物歲行成君子於是謂蔡子善
自字其老也稀省以息慮玄冲以導和游適以陶真斂
退以諧物是故身鮮疾疾家無橫非人無詬謗兄弟式
睦子貴大州遽遽于于怡然考終斯隱人之行也李子

曰予於蔡有三徵焉夫安壽吉者天之所以優善類者也蔡氏備之足稱善人矣孔子曰善人吾不得而見之矣得見有恒者斯可矣予今見之不足占世乎按蔡氏其先潯陽人也名宗先者國初從軍南征渡采石充海船米字號牌總兼領庫船嘗赴景陵衛投戰檄賞銅鐵五石已論平陳功又賞銅錢漿酪諸等曰蔡保者隸彭城衛護周王永樂間調護衛入京而保以鞍匠留侍王遂居大梁保配王氏生子四長曰玉次曰琰次曰良

又次曰璟琰配鄭氏生子二長即思賢次曰銘生女一
侍周懿王封夫人思賢配蔣氏生子三長曰俊信陵
王典膳次曰俸濱州知州次曰佩思賢生宣德壬子九
月十九日卒嘉靖癸未四月九日得年九十二歲弘治
末嘗詔拜壽官蔣氏生正統庚申正月二十三日卒
正德乙亥二月十一日得年七十七歲蔣之卒也業葬
土城南故雞鵝池地於是啓其窆與夫合是年七月有
八日也銘曰蔡子篤行爰以孝聞嘗冀籲天介福何云

蔣也相之執恭守勤奉姑服勞或至夜分子剖郡符飭躬流芬雙玉載瘞連理同墳於惟茲野有賢在下過者立馬厥淚攸灑

江都縣丞蘇君墓志銘

江都縣丞蘇君者尉氏柏岡里人也名琇字彥器大父春生五子第四曰明明亦五子第三曰蘇君蘇君亦五子第五曰濟衆來請銘其父墓往左生告予曰蘇君蓋少時一憧憧人也然顧內修攻學學足以第也然乃竟

不第竟為丞其始為丞也人告之曰江都土浮俗偽蘇君曰嗟是欲使我先偽逆之邪夫偽逆之必先覘顏色顏色之不得必機關其言語言語之不得必鉤賸其陰細此而不得必有誤中之民矣安有為人上而忍為此者邪卒不以偽逆江都民江都民見其丞誠也亦率誠事丞居無何蘇君歸民相挽留泣曰丞奈何歸蘇君曰田荒矣歸欲鋤之耳民曰鋤田勞孰與為丞君笑曰汝謂丞為逸乎竟歸徜徉以壽終今按厥子銘狀蓋蘇君

生正統三年十一月四日卒正德五年八月五日得年七十三歲左生稱其壽是矣狀曰以明年三月一日葬城西之原又曰蘇君五子皆出自韓氏其父五子皆自王氏其大父五子皆自某氏銘曰東有嘯臺嵒如崂如蘇冢在西斧如堂如其中坎如並峙儼如

明故遙授滄州判官賈君墓志銘

賈君者通許縣人也蓋賈氏世居通許今其墓有三一曰韓朱岡墓一曰郭東墓二墓者賈氏宋元以來墓也

纍纍相望一日三里岡墓則葬君曾祖以下君曾祖諱
贊洪武間以人才為鉛山縣知縣贊生麟封監察御史
麟生恪少與婁良齊名語曰婁良賈恪氣如山岳恪舉
進士官至山東叅議是為叅議君叅議君有三子而賈
君長最賢二弟又並賢顯貴無忝於賈君以故通許人
推豪鉅族無能先賈氏于是賈氏族聞天下而賈君又
自謨次其世系播之人故賈氏諸所名德及諸陰細行
可誦說者乃咸由是彰矣故曰成賈氏者賈君也天順

間募馬實邊賈君入其馬為監生已患癰癥鬚眉皓皓
爾叅議君會又卒賈君乃力上書辭曰臣疾弗克事事
願給空銜養母歿身許之得遥授滄州判官拜于家前
叅議君致其仕來居大梁日與老長會約遊大梁人蓋
咸望風尊敬之及君拜官亦日與老長會約遊而大梁
人輒又望風尊敬之顧愈甚故人為之語曰賈君善繼
志賈君性靜重少言不喜酒遇酒到口輒推去然坐竟
席席上人即曉曉呶呶揎拳臂相狎侮賈君第坐顧竟

席席上有歌舞女賈君第坐如無歌舞女即竟席不見其不衣冠歸也夫鄉飲者天下之大防也今鄉里無賴子弟類鑽刺深衣大帶炫曜而官宦士謂不甚損益而弗省也及賈君為鄉飲賓乃遂言鄉飲禮頗施行然今亡矣其生以正統七年七月三日卒正德四年五月十七日年六十有八歲取王氏生二子希程希吳一女為輔國將軍夫人繼取耿氏生三子希高希言平定郡君儀賓希冉一女適李鯨君名宏字仲仁號懶雲居士云

銘曰有雲漉漉以觀我時其行施施卷於遠雲奚悲

封徵仕郎中書舍人何公合葬墓志

信陽何景明為中書舍人無何即致仕歸歸逾年喪其父已又喪母將葬俾來乞銘余扶涕曰余始與景明友蓋日想見其父母乃今不及見矣志曰封徵仕郎中書舍人何公者信陽州人也諱信字文實其先居羅田曾祖太山始徙信陽高皇帝過信陽樹二旗令曰為我軍立紅旗下為民白旗下於是太山即立白旗下太山

生海海生鑑陰陽典術鑑生何公何公少使氣大言任
謀然數困鮮成事人不之奇也有盧翁者識之女以女
語人曰吾甥三十當有聞是後有異人產其家公三十
果辟為布政司承差見諸承差者污賤無藉也又率務
裘馬相高何公恥之獨潛飭行檢誦書久之頗自表見
而布政使吳節因竊怪之特使董大役事出其金公則
立辦顧又入其羨金請賑貸所全活以萬數吳公乃大
喜以為賢引置心腹成化末闕中大飢詔發漕粟萬石


至衛口曰河南發卒輓抵關當是時河南獨南陽汝寧
熟於是河南乃即發南陽汝寧卒萬人將行何公聞之
恚曰今關中米石不過直金一耳今奈何若是矣乃入
言於吳公曰公誠權出帑金萬使入關糴可遂得萬石
乃因令二郡曰能人出金一即罷若役仍給粟人一石
二郡人知役且十倍費必踴躍人願出金一而不肯受
粟是公一舉活關中之民弭二郡嗷嗷之口而省粟萬
石矣吳公曰善卒用其計何公於是有名河南然顧豪

亢自負太監汪直至河南河南都御史以下震懾皆匍
匐行上謁會直左右俾都御史劄屬括名馬都御史業
已諾然手戰不能執筆汗簌簌下何公在旁曰都御史
大臣不當煩吏事乃奪筆代都御史劄其無嚴貴幸如
此其後為會寧渭源二驛丞又有抗監貢獅番武官及
禽巨猾李氏事今皆不詳第詳其著者焉何公為人大
段厲氣義不欲齟齬與世浮沉或見尊官大人有弗潔
也則退而唾罵之而汪直過時按察使陳選見直獨長

揖不拜何公終身歎慕之曰陳按察真男子也何公故
病足往在渭源病足會御史行縣簿尉以下當徒走奉
輿馬行輒數十里何公於是仰天竊歎曰嗟乎可以去
矣遂即棄官歸然貧無馬騎有人資之車一乘馬一匹
乃始歸而舍城西溪上即又日歌吟力田誦書郡人即
無小大咸望風起敬公稱先生不曰何驛丞也乃後何
公以子景明封官乃何公不欲稱其官稱曰梅溪居士
郡人即又稱梅溪居士云先娶盧氏即前盧翁女盧翁

有異術嘗以策干石將軍有功已棄之亡歸故不及於
難繼娶李氏其父山東人也寓羅山盧家羅山盧家故
與盧翁往來善盧翁因竊知李氏女賢及盧氏死乃力
主李氏女繼盧氏曰產異人者此女也乃後二氏皆封
孺人云盧氏生景韶累官東昌府通判卒景暘舉人而
李氏生景暉景明又生女適孟洋今為行人何公生某
年月日卒某年月日年若干歲盧氏生某年月日卒某
年月日年若干歲李氏與何公生同歲卒同月以某年

月日合葬西山之麓



空同集卷四十六